



L'architecta Caroline Gasser, il president communal Hans Peter Casutt, il cusseglier guvernativ Martin Jäger, igl inspectur Vigeli Jacomet, il menader dalla scola Silvio Lechmann ed igl inspectur Alexi Nay (da sen).



Ils scolarets e scolars da Sagogn han inaugurau lur scola nova cun enzacontas canzuns sut la direcziun dil meinascola Silvio Lechmann.

FOTOS S. ROTHMUND

Curascha da construir nova scola sepaga

La nova casa da scola a Sagogn ei vegnida inaugurada

DA SUSI ROTHMUND / ANR

■ Dapi il schaner d'onn pulsescha la veta ella nova casa da scola a Sagogn. La primavera ei la scola veglia vegnida scarpada giu ed ussa paradescha leu ina biala plazza da scola blaua. La dumengia ei il center da formaziun cun attractiv contuorn vegnius inauguraus.

Sco Hans Peter Casutt, il president communal da Sagogn, ha declarau ein ils 5,2 milliuns francs ch'ei vegni investai per la construcziun dalla nova casa da scola ina summa considerabla per ina vischnaunca sco Sagogn. Tenor Casutt eis ei reussiu alla cumissiun da baghegiar, ensemen culs architects Curschellas e Gasser da Glion e las fatschentas cumpigliadas, da tener en il budget e corrisponder allas pretensiuns da qualitat. El ha era puntuau che las lavurs seigien vegnidas exequidas oravontut da fatschentas ord la regiun: «Ella situaziun da concorrenza actuala secapescha quei buca da sezez, mo sco ins vesa ei quei fetg bein pusivel.» Ozildi ed oravontut en regiuns muntagnardas secapeschi ei buca da sezez che scolas sappien vegnir mantenidas, nundir renovadas ni schizun construidas da niev. Tuttina seigien ils da Sagon stai dil clar avis ch'in center da scolaziun fuormi il center dalla veta ed il vitg Sagogn possi era sesviluppar ordlunder. Sco ei para ei la curascha da prender quella decisiun sepagada ed il president communal ha puntuau cun satisfacziun: «Dapi nossa decisiun per ina scola el vitg ei la conjunctura da baghegiar carschida e novas famiglias ein vegnidas neutier.»

Impurtont edifices

El Grischnun ei l'inauguraziun d'ina casa da scola nova in eveniment spezial e rar. Quei ha era Martin Jäger, il cau dil Departament d'educaziun, cultura e protezziun dil Grischnun, declarau e remarcou che la casa da scola nova cun mobiliar modern ed in ambient emperneivel da scolar e sescolar levgieschi segiramein enorm l'instrucziun. El num dall'entira regenza ha il cusseglier guvernativ gratu-

lau alla vischnaunca da Sagogn e sias autoritads per la curascha da realisar quella nova casa da scola. Oz seigi la scola buca semplamein in «edifici d'instrucziun», mobein dueigi porscher differents spazis da viver per differents fuormas da luvrar. Ei seigi semussau che las stanzas nua ch'ei vegni scolau ed empriu hagien ina gronda influenza sil beinesser human. Ellas influenzeschien aschia era nies secunter e la prestaziun. «Quei va aschi lunsch che stanzas da scola e lur architectura vegnan perfin definidas sco 'tiaza persuna d'instrucziun'. La casa da scola nova a Sagogn ei concepida aschia ch'ella corrispunda arisguard la planisaziun dallas stanzas d'instrucziun exact a quei intent pedagogic.»

Nunconvenzional

La casa da scola ei vegnida planisada dils architects Curschellas e Gasser da Glion e sco Caroline Gasser ha declarau en discuors cun l'Agentura da novitads rumantscha ei la construcziun d'ina casa da scola propi enzaitegi fetg rar ed ei seigi era stau per ella l'emprega ga ch'ella hagi saviu planisar in niev baghetg da scola. La scola a Sagogn numna ella ina scola buca convenziunala. Speciala seigi per exempel l'entrada el plaunterren che vegni nezegiada per tuttas classes primaras e dalla scoletta – che sesanfla medemamein el plaunterren – sco gardaroba. Aschia seigien ils corridors sillas alzas libers e porschien sper las stanzas da scola ulteriur spazis per realisar projects ni scolaziun singula. La surfatscha utilisada munti a rodond 1500 meters quadrat. Ord motivs statics seigi ina construcziun da betun stada necessaria ed ils responsabels seigien sedecidi da schar las preits endadens en betun natural. Forsa empau freid sin l'emprega egliada, mo ussa che las stanzas e corridors ein plein veta e beindecorai fan ellas ina buna pareta. Las finiastras ein grondas, envidan da guder la biala survesta e laian entrar bia glisch. El trettetg sesanfla l'aula che vegn nezegiada durant il di dalla scola e la sera d'uniuns ni per autras occurrenz. El plaun sutterran sesanfla la canzlia nova, era ella cun grondas finiastras, denton ina

meins biala survesta che ord las stanzas da scola. Ina sfida per l'architecta eis ei stau d'adattar il baghetg, materialias ed installaziuns aschia ch'ei corrispundan als basegns dils affons. Adattada als basegns ei era la nova plazza da scola cun ina cuvrada d'asfalt ch'ei surtratga cun materia artificiala che survescha sco schurmetg encunter cupitgadas.

Secund dacasa

Da tutta calira han las scolaras ed ils scolars cantau enzacontas canzuns sut la bigetta dil menader dalla scola Sagogn, Silvio Lechmann. Ils plevons Alfred Cavelti e David Last han benediu ils stabiliments e la Societa da musica Sagogn ha enramau la fiasta musicalmein. Sco Lechmann ha declarau en siu plaid d'inauguraziun vegni la nova casa da scola buca sulet ad esser in liug che prepari las scolaras ed ils scolars pil proxim salem da scola e la finala era per la veta, mobein vegni a porscher aunc bia dapli als habitonts da Sagogn: «Ella vegn a possibilitar veta e convivenza e surtut sustener tuts ch'instrueschan, sveglian e sviluppeschjan talents e savida. Il svilup dall'instrucziun sa aschia vegnir promoviu vinavon e sia qualitat vegn segirada.» Il menader dalla scola ha puntuau che las scolaras ed ils scolars seigien il futur e sch'el vesi lur fatschas cuntentzas – e quei era tier las persunas d'instrucziun, lu sappi el dir: «Nossa scola ei in liug nua che vus sesentis bein. Cheu passenteis vus prest la mesadad dil di – pia ei la scola plitost in secund dacasa.»

Part veglia

Il spazis ella scola nova per imprendier, mussar e viver vegn nezegiaus actualmeind da 20 scolarets en scoletta. 54 scolaras e scolars en scola, siat scolastas ed in scolast en pensum cumplein ni parzial, dad ina pedagoga per l'instrucziun integrativa e da quater persunas per l'instrucziun da religiun. In baghetg dalla scola veglia exista aunc e leu sesanflan la halla da gimnastica che vegn nezegiada per l'instrucziun da sport da scoletta e scola, da gruppas ed uniuns ed era per radunonzas e seras d'informaziun da different gener. La halla ei



Avon 63 onns – 1953 – havevan ils da Sagogn era giu la curascha da baghegiar ina nova scola. Lu mavan ils carschi silla foto – sco ils affons che poseschan cun els, ussa – en la tiaza classa e quei ei stau motiv avunda per ina sentupada da classa a caschun dall'inauguraziun.



La nova casa da scola a Sagogn ei in baghetg modern e marcant che ha custau 5,2 milliuns francs.

praticamein occupada durant l'entira jamna, sco era la tribuna durant las seras, aschia che l'aula ella nova casa da scola ei fetg beinvegnida per ulteriuras activitads ed occasiuns. Il foyer vegn utilisau per far pensums da scola durant la meisa da mezdi e temps da survegionza suenter scola. Quei mo pils affons ch'ei s'annunzia per

quella purschida en connex cullas structuras dil di. Plinavon ha ei leu ina cuschina cun ina stanza dasperas.

reclama

«ÜBERTRIEBEN, UNREALISTISCH, FOLGENSCHWER!»



Magdalena Martullo Unterhumer, Nationalrätin SVP

NEIN 25. September zur Initiative Grüne Wirtschaft

gruener-zwang.ch



La Societa da musica da Sagogn ha enramau musicalmeind la fiasta d'inauguraziun. Davos la part dalla scola veglia cun halla, foyer e cuschina.



Tenor Hans Peter Casutt, il president communal da Sagogn, ei il siemi da biars affons ius en vigur culla scola nova.



Il cusseglier guvernativ, Martin Jäger, ha giu plascher d'assistar alla fiasta d'inauguraziun dalla scola nova a Sagogn.